

Segun Joyceline Croes:

Reconocimiento di Nacionnan Uni pa Michael Kip ta un algo unico y bon mereci




ORANJESTAD – Pa Drs. Joyceline Croes, e medaya di reconocimiento cu Nacionnan Uni a entrega postumo na Michael Kip, ta algo unico y bon mereci.

“E ta un honor hopi grandi y e ta algo sumamente bunita; e ta yena mi cu orguyo paso mi sa di hopi cos cu el a pasa aden y mi sa ki sacrificio bo ta haci pa biba e tipo di bida aki,” asina e actual miembro di Ministerio di Asuntonan General y ex colega di Michael Kip na Nacionnan Uni, a duna di conoce. E expresionnan aki a bin na final di e ceremonia solem teni e siman aki pa entrega oficial di medaya na famia.

Croes a conta cu e tabatin e honor di comparti trabou y tambe un amistad cu Michael Kip. A recorda cu Kip a yega New York prome y pa motibo di esey a yuda enormemente den su instalacion na e ciudad cosmopolita. “Un bon persona y amigo, un hende hopi

dedica,” Croes a menciona recordando. Aunke cada un tabata traha den diferente



departamento, Kip a yuda Croes hopi pa compronde e organisacion grandi cu ta Nacionnan Uni y tambe tabata comparti experiencianan.

E boluntad pa yuda otronan,

sigur tabata un característica di Michael, segun Croes. “E tabata sumamente involvi,”

te hasta yudando otro empleadonan di UN y p’esey Kip tabata forma parti di asociacion di trahadonan. Tambe a recorda con nan a traha hunto den e mision di paz na Mozambique, y aunke nan

tabata destina na diferente ciudad; asina mes tabata topa otro cada dos siman pa combersa y comparti e experiencianan, cu e otro unico Arubiano cerca.

“Ora bo ta den un pais asina, y un organisacion grandi asina, e ta algo unico,” Croes a comenta. Den Michael Kip el a ripara di biaha cu ambos tabatin e mesun deseo pa traha pa humanidad, sin pensa mes riba e peligernan.

“Mi ta haya sigur su falta y tabata un honor pa comparti e parti ey di bida.” Croes ta kere cu e medaya ‘Dag Hammarskjöld’ ta un reconocimiento cu ta hopi unico pasobra Nacionnan Uni no ta duna e reconocimiento aki facilmente. □